

翁

山

詩

外

番禺 屈大均 撰

茗南 凌鳳翔 訂

五言古二

維帝篇 并序

吾屈自楚而秦自秦而南越源流甚遠故從番禺始遷之祖以溯三閭而撰維帝篇其辭曰

維帝顓頊裔周氏相蟬嫣食土荆湘邑屈姓何連綿左徒死懷忠日月在羅淵宗臣不去國恩義同比干子孫藏劒佩世守長沙田漢初實關中昭景同西遷族貴稱王孫文采未相宣武帝愛離騷始命淮南箋買臣工楚學能言廿五篇三閭之弟子

王逸益精妍所恨靈均孫名姓未有傳唐時美詞
藻祇有屈同仙千載失宗支遺書蕩如烟徒聞宋
南渡我祖從秦川抱挾離騷經肇居番禺偏番禺
兩山連桂林橫大川冰霜避炎德熊羆盤層巒神
靈所窟宅彤勝亞中原少祖擁義兵力拒元可汗
言從東莞伯歸命洪武年褒勳錫彤矢作鎮臨
燕本支在菱塘世德列朝鵷三閭大夫祠義義南
澥邊景差與宋玉配宮籙蕪壇女嬃之嬋媛歲時
祀孔虔天問及九章淒悲被笙絃稱觴何濟濟伐
鼓復填填女巫獻玉璫姣服若飛鸞靈兮騷兩螭
雲旌來翩翩迎之激楚舞侑以招魂篇習射張大

侯中者爲神歡山谷氣龍從樛木繚蒼烟土膏春
旣動禾稼鬱芊芊聚族二千人公畊茲墓田百果
從離支芬馨充豆邊龍目釀酥醪飲者壽多延東
家籠蔥竹西隣翡翠蘭中池翔文魚孔雀尾爛編
皓髮四五叟混茫談羲軒子弟工文辭風華尚小
山榕樹大十圍流泉應鳴蟬百尺木綿花朱火然
高天靈境似華胥淳俗誇桃源花落鷄犬靜處處
張春筵爰從廣州陷我父方言還勤王功未成避
世志難宣吁嗟蚩尤亂閭闔紛刀鋌湘君沉錦瑟
重華失金鑾四解沸鼎鑊九州驚虛弦將相婦人
衣崩角穹廬前其時歌薤露吾親淚漣漣龔勝屢

絕粒陶潛時鳴絃遂築懷沙亭背岡帶修湍岌岌
遠遊冠賣藥東市廛增城受丹訣委蛻從稚川正
氣得所繇庶幾返自然嗟予破家產報國多迍邴
左持將軍頭右堪秦王肩虎狼不足刺生劫酬燕
丹吁嗟天命衰脫身出函關爰從翟義公與師平
陵西逐日麾金戈捎星曳紅旃黃帝駕象車飛廉
揮虹鞭一夫先拔木五丁齊開山魍魎紛來戰雷
霆相糾纏予時當一隊矢盡猶爭先猛士盡瘡痍
一呼皆騰鞍手剝太行纓足蹂陰山豳雄虺昂九
首吞人益其肝神虬忽失穴潢汚蟠蜿蜒不能爲
國殤含羞餘空拳天方造草昧養晦爲大賢鵬運

需扶搖折翼避鷹鷂割肉聊自食毋須膏火煎婉
彼蛾眉女瑤琴中道捐大禹方胼胝遑恤塗山顏
客獲千金姝乃遭驪龍眠英雄不學道功名安足
傳飄然登太山長嘯搖天門雞鳴見澠日湧出如
金盤神光騰八極頓豁鴻濛前盤古日九變玉斧
開方圓死生如循環尋之渺無端公孫舞雙劍宜
僚弄一丸鬼出忽電入兵機獲無傳囊括其雌雄
妙得將將權蒲且彎長弓風胡操龍泉衛我歸羅
浮省母梧桐間鳳凰挾其雛羽儀九苞妍一鳴聖
人生再鳴泰階平此身非血肉五嶽共喬壽庶幾
鞠育恩少報罔極焉弟妹未婚嫁夙夜亦懷仙寡

兄奉爲師冥揆太素言梁鴻嘗牧豕弄玉思騎鸞
織縑爲親衣采薇爲親餐甘瓜抱苦蒂骨肉相負
緣自謂依庭闈沒齒同貞堅何意鮮飈激孤雁吹
飛翻日月有盈虧吾生遑得閒揮涕出門去斯民
方倒懸事親貴養志治國若烹鮮乘彼太清霞白
鹿何娟娟塵垢鑄堯舜羽翼凌綺園御世有操縱
六轡如琴然四足若牛馬繫繫受拘牽東遊寒風
闕西戲崑崙巔足性自無待橫流一手援回顧鄉
閭中蕭蕭桑梓寒仲尼懷疾固思歸修遺編百川
朝滄溟清濁必還源北斗天中央周流光不偏姑
射以神凝使民疵厲蠲蘇耽能反本化爲黃鵠旋

詠古

日月鏡萬方精華在君子一虛而一盈以我爲終始包犧至純厚畫卦順斯理神明所旁通日月乃文字平生好學易精微性所喜未得大過無幡然已老矣

黃帝與重華在昔皆遠遊翩翩挾妃女翱翔窮九州黃山有丹臺梧野有珠丘故都終不歸宮闕隨雲流帝生實神靈仙道未嘗求無爲合坤乾禪受如春秋

神堯愛二女盡以歸重華長者爲女君容顏如朝霞少者爲夫人亦若扶桑花衫衣被南風琴歌何

紛葩朝同蓬萊宮暮去瀟湘涯帝旣崩蒼梧妾亦
捐長沙神光兩不離月以日爲家

管蔡殷遺臣忘親以徇國武庚志中興忠孝皆可
則天命已去殷報讎終勿恤如何微與箕弗往爲
羽翼淒酸麥秀歌迷民淚沾臆故都遂丘墟徬徨
亦何極

秦繆伐西戎開地千餘里天王賀金鼓攘圯甚光
美用譎得繇余遂以霸西鄙不忍舍良臣收之同
穴死身沒猶愛才泉下須輔理哀哀黃鳥詩豈足
知君子殺身殉令名兼以報知己
之推昔從龍割肌啖其口文君旣升雲泥處功不

有此身得全歸絲上偕慈母隱居焉用文躬耕日
胼手環山作湯沐報德恩良厚介山高入雲佇望
以永久

王蠋能存齊功與安平似義激亡大夫相聚求王
子一言作戰氣燕軍盡披靡布衣不北面在位寧
無死殉國成功名爲齊復倫理襄王得立時封爵
乃忘爾

湘纍澤畔吟亦似秦庭哭同懷宗國心夙夜憂傾
覆自古楚賢才二君最貞淑忠愛格上天大仇終
報復三戶卽三閭亡秦在公族義帝雖不終諸侯
盡臣僕漢興離騷顯楚聲被絲竹高帝歌大風夫

人和鴻鵠皆是離騷餘哀樂同散篤

相如睨柱時勇氣一何激一壁雖輕微如以國與敵澠池相高會盤瓶使秦擊頸血得濺王聞言盡悚惕威信虎狼秦御史書功績知死則必勇智士以爲的

騏驥盛壯時一日馳千里臣精今消亡衰老詎可使自殺送荆卿激之爲丹死燕中節俠多無能救太子狗屠與漸離不請非知己擊筑和歌時相泣徒爲爾平生游諸侯所結賢豪士曷不待須臾倉黃挾豎子忼慨爲羽聲壯士髮盡指悲風何蕭蕭吹淚成寒水

維昔二周君皆以誅秦亡大義帥諸侯王朝亦有
綱惜哉無良將九鼎歸咸陽是時秦亦滅嫡裔止
莊襄政也實姦生呂代嬴氏興二世不旋踵趙高
撼其吭前秦祖蜚廉後秦祖文信無德易顛覆虎
狼總推刃詩書亦何罪儒生同一燼痛絕驪山坑
多言說堯舜

徐福入海中將以求神異三千童男女五穀工師
備西皇資以行持爲海神賜行行得平原膏腴可
興利振子盡妃匹畱王何神智福也非神仙救民
有奇意詐之出湯火三千誠不易傳今東海中亶
州是其地相連數大洲波濤人罕至自作一蓬萊

以爲祖龍戲爲仁亦滑稽自是神仙事

峩峩太舉山上有四毛女苟非逃學仙從死成黃
土光光人魚膏泉下照歌舞淚作水銀海腸爲黃
金縷秦時女高士麗英與爲伍翩翩金精峰相逐
有毛羽

陳涉奮布衣遂成土崩勢偏袒一大呼秦已無二
世匹夫舉大名湯武若符契扶蘇雖當立詐稱亦
非計將誅無道秦師行宜大誓成敗在上天西向
乘鋒銳毋示天下私自王以微細爲秦多益敵六
國蒙嘉惠入關令諸侯功德可爲帝

魯儒抱積怨發憤于陳王艱難負禮器卒與涉俱

亡匹夫苟建義瓦合亦非嘗禮樂所憑依縉紳爲之倡涉亦聖人徒能知孔鮒良先置博士官以甲爲紀綱用人先諸儒文學已有光惜哉昧行兵破滅成倉黃

倉海君何人家能畜力士金椎誤中時秦王魄已褫報讎雖未成天下兵以起功爲陳項先豪俊聞皆喜賊在下邳中無人言孺子從容得步游任俠驚閭里老人教彊忍命之下取履豈有王者師而爲血氣使

不忍殺沛公使之得天下英雄有至情難忘妾與馬亡我實繇天知命乃無假慷慨泣數行實爲紅

顏者王霸如浮雲功名羞苟且倉皇垓下歌直可
繼騷雅斯是國殤篇三軍和者寡悲風起帳中殺
氣橫原野河漢慘無光痛飲過三尊自刎報父兄
江東淚同灑善敗能從容功亦在區夏

滎陽諸女子功與紀信似夜出冒楚圍披甲爲戰
士楚軍似刈芻血流作渠水君王旣無兵婦女相
驅使幸有三千人可以代披靡楚軍雖受欺流涕
亦不止妾命甘如塵得無大王恥自古戰爭中國
殤寧有此

淮陰不悖漢忠信天下知可惜智絕人乃爲兒女
欺當帝至楚時淮陰能識幾相携鍾離昧逃於東

海濱棄王如敝屣神龍不受羈遠追范大夫近爲
畱侯師豈非明哲者超然有道姿

漢帝亦多情酒酣思猛士悽悲大風歌辭與招魂
似韓彭皆已亾忼慨不可止泣下爲淮陰非是悲
游子刻薄鐘室誅終古帝王恥忍以英雄人以與
兒女子

漢高諸功臣項伯誰能似次則昌國君能全王父
子大封諸侯王亦及一雍齒如何忘滎陽紀信代
之死君王恩誼高豈以詐降恥滎陽與平城得脫
以女子倉皇乘黃屋誑楚一何鄙

陵母何慷慨一死如田光激子成功名始終事漢

王丈夫有侯嬴婦人有陵母烈烈漢功臣乃在一箕帚教子以忠貞令名在人口天下既定時陵封宜勿受請以母爲侯湯沐及諸舅伏劍墓門前黃泉期速朽

季布多戰功數能窘漢王推剛以爲柔得脫因濮陽朱家不相負名聲聞四方滕公非任俠爲漢求忠良從容爲上言私怨以之忘廷叱樊將軍十萬罷橫行辭氣何剛直殿上皆驚惶天下慮搖動生民尚瘼創嫚書禽獸言安足爭短長孝惠至高后兵革久不興實以季布力海內得寧康季心爲任俠氣蓋關中兄弟畜灌將軍兄事惟袁

絲殺人乃恭謹赴義如渴饑壯士爭爲死肝胆誠
吾師十載持大黃乃爲豺虎欺智勇不足恃遑遑
將何之龍蛇日起陸天方發殺機閉門造奇器陰
陽相推移北斗有天樞握之誰能知

叔孫誠聖人能知世要務先言諸大猾以爲爪牙
布漢王方虎鬪矢石宜爭赴諸生豈能兵羣盜知
有素短衣變楚制毋使大王怒道亦尚委蛇希世
非無故當時腴二世虎口脫危懼狗盜安足憂守
尉自能捕斯言誠滑稽陰已亡秦祚直諫亦有時
國本以堅固

馬援處田牧有羊數千頭一朝散昆弟簡君聊邀

遊光武非人敵委身傾陰謀爲君取隗囂聚米成
山丘移師滅先零轉戰平交州男兒有汗血自當
死戈矛馬革包馨香雲臺垂勲猷悲哉武谿深三
軍泣篋篋水崩船不上淒涼卧壺頭用兵貴萬全
塗有所不繇據鞍徒顧盼一挫失通侯

乾坤造草昧狗盜方爭雄干將不善割勢與鉛刀
同少小習兵書慷慨氣如虹沈算貴先機羞爲汗
馬功龍騰階尺木鵬運須長風冉冉歲云徂衰髯
如飛蓬王業尚無始天心鮮有終淒淒梁父吟感
歎將何窮

詠史贈楊君

張耳從漢高實用甘公說任翬志偏霸亦以天文
決五星射越門光氣分隆準甘公言一倡諸侯盡
心折聖漢以龍興功可齊人傑君今治天官言星
復明哲手執大人符機祥慮先泄觀文以察變吾
嘗求五列元氣斟酌之欲將斗柄揭三易有洞璣
微言幸未絕與君爲天數陰陽受開閉災異謹大
書憂患惟崩竭天監豈無知雲漢光尚徹牽牛終
服箱南箕將失舌織女多文章經緯資吾拙君且
引兕觥俯仰毋悲咽

贈邳州季生

中原何洶洶英雄日暮時香餌引泉魚重幣購壯

山詩外 十
士嗟君勇絕倫，昆吾猶未試入猷。而出鈴中道，傷捐棄僥倖。成功名王侯，久喪恥盜妬。膾人肝，仲尼不敢視悲哉。聖人才甲兵，成虛器。游魚脫深淵，飛鴻戾天際。貧賤聊娛懷，敦我箕山志。

猛虎行

邊地不生人，所生盡奇畜。野馬與駱駝，駒駼及駝鹿。羴羊千萬頭，人立相抵觸。上天仁衆獸，與以膏粱腹。變化成猛虎，食盡中土肉。哮吼一作威士女，皆穀觶。廣南人最甘肥者，如黃犢。猛虎縱橫行，饕餮亦逐逐。朝飲惟貪泉，暮依惟惡木。人皮作穢裘，人骨爲箭鏃。人血充乳茶，脂膏雜紅麴。子狗有爪

牙攫搏苦不速惡性得自天牝牡日孳育在天爲
貪狼在地爲葷粥人類日已盡野無寡婦哭隆冬
不患饑餓骸亦旨蓄多謝上帝仁猛虎享天祿爲
獸莫爲人牛哀得所欲

橐駝行

橐駝生一女不肯與之乳羗兒謂橐駝恩薄乃如
許女亦肉爲鞍女亦力如虎重能馱帳房可眠我
妻女屈足受重載萬斛如鴻羽中國奇畜稀腫背
人爭取牝牡不用分獨峰亦愛汝泉脈每能知跑
地水如縷青海熱風來先鳴報行旅糞烟直上時
望似狼烟舉有時亦人立兩脚相支拒夏至雖退

毛封牛誰敢侮橐駝且自歡聽我兜離語我鼓大
琵琶一曲爲而舞橐駝知音聲湮流復如雨飽飫
橐駝兒蹄峰免刀俎

古鼎篇爲鄧文作

文以古鼎爲祭器

君子有寶鼎神光出重淵先王與先公手澤所盤
旋得自少昊墟魯侯世相傳地不愛重器以君能
奉先亨可享上帝豈惟祖禰賢木火命已凝腹中
有純乾神靈所憑依洋洋在豆籩摩挲陰陽文隱
若蛟龍纏皇天鑒仁孝馨香貽萬年耳目咸聰明
金玉貫無偏

贈陽春令

達人志濟物而不卑一邑春州古瘴鄉膏澤乃先
及王孫學道姿手嘗珪璋執賦詩多土風聲教有
篇什美刺何溫柔如春無不入訟庭無人時群山
相拱揖爲養若寒泉人人得自汲空桐有巖穴風
雲互嘯噏陰爲石乳凝陽作天柱立我昔攀諸峰
猿狖頗相習圖經撰未成幽怪多摺拾君於簿書
餘新志已在笈聲色雖可娛神明期厚集交廣有
春秋乘時更補緝

夜上灘江作

水落灘更高我船苦難上舟子聲淒酸榜歌不能
唱天寒白霧深川路迷蒼莽山月忽西東愁人苦

相向霜氣一冬乾水聲半夜長衣食分熊羆無金
士難養久戍盡黧黑絕地無鹽醬所歷州縣多牛
酒有誰餉微聞沙中語軍窮生怨望

送梁藥亭北上

南爲天之陽其人多文明精神得日月變怪成文
章朱火所沐浴一一含珠光蔽虧牂柯海照曜祝
融宮朱明一洞穴陰與衡嶽通祝融亦水帝來治
臨扶桑文章作司命吾黨所大宗炎德在辭華明
明燭四方雲漢同昭回朱鳥分光芒始自洪武初
五星會文昌海隅作鄒魯白沙應其祥弟子王佐
才冠以梁文康不草威武詔以臣名君王秦藩却

請地正直持天綱忠謨動武廟相業高始興蘭
汀乃族孫揚葩繼後行執林尊正朔風雅何鏗鏘
其筆女珊瑚其墨黃金璫寫用鮫人綃薰以鶴頂
香奇麗掩中原鬱爲日南英與師泰泉公大小皆
鳳凰君今同一本峩峩南海梁明月出瓊蚌朝霞
吐神龍丹山無凡羽桂林多奇芳六經乃神器羽
翼不敢怠逝將嗣先美令名流玉堂努力就計偕
上書驚公卿同里霍與倫亦可相翱翔伊予爲隱
夫未能垂素功研精在神化徒欲參羲皇著述雖
滿籬不如若糝糠及早得志歸求我乎混茫

玉虛宮夜作

北辰垂大象造化實樞機吐納天中黃群星蒙光
輝真氣貫我身洪荒如盤羲清宵事禹步斗路無
端倪靈風吹羽裾飄飄將安歸天回九地轉彷彿
乘龍螭嗟彼世間人神珠棄汚泥變詐成功名英
雄誠小兒何如長桑君長詠還虛辭

送家舍人

白雲何蓬蓬朝別岱山中豈不念本根仙人在崆
峒似君久流離萬里思從龍天心未厭禍顛沛將
焉窮厲夜得寶劍安知雌與雄雄能制諸將雌亦
至三公贈君及壯年往取留侯功

古意

妾有大秦珠嘗含明月姿明月虧有時妾珠光不
移朝懸妝鏡臺暮繫紅羅衣君心不可照持此委
沙泥願得青鸞鳥銜將贈宓妃

夷光有寶鏡沉在若邪溪朝霞沐其彩明月揚其
輝春秋迭代謝菱花終不萎安得佳麗人持將炤
蛾眉

落花辭故枝飄零逐溪水道逢浣紗人拾花置懷
裏與君同春榮相憐貴終始但願東風吹長墮機
中綺

淒淒歲云暮蟋蟀鳴堂隅場苗不可食誰當維白
駒伊昔采桑女窈窕秦羅敷銀鈎挂柔條綠蕤映

羅襦託心自有所但笑使君愚

詠懷

嵇琴欲高張角弓貴持滿至人漱正陽神明日三
澣駕言陟天孫攬嘯迎風館明月升娥光鮮霞流
玉盃逢君安期子相求何嬾婉至道如膏梁厭飫
世所罕秦皇不可說懷策自蕭散撫節一悲歌時
逝將奈何玄霜殺百卉積石揚洪波寧無魯陽德
回日扶桑柯

峨眉有仙人顏如鰕日光蜿蜒御雙龍雲氣四飛
揚朝遊蓬萊山暮歸太微堂天命自流行混沌居
中央我爲德克符萬物皆無傷窅然喪天下乃能

應帝王

條風拂櫻梅翠羽鳴參差昊天愛萬物飛植各乘
時如何苦貧士鬢髮成素絲幽蘭生谷底朝陽無
見期渴飲堅冰漿飢掇丹林蕒苟非含道腴安得
好容姿

驚風鼓采柏棲鳥群翻飛開門望行人浮雲暮不
歸種桃愛其葩種柳愛其枝雖無歲寒用夙昔同
裳衣魚目亂火齊蟾蜍蝕清暉遂令金石交千里
相乖違拔劍擊盤石石碎劍亦虧感激將何言淚
下空漣而

仙人驂文螭西遊閬風闕神珠藏九淵變化如日

月顧見世間人聲色自沉沒仲尼居九丘至道當
誰悅哀哉人命危蜉蝣傷掘閔茲時方板蕩匡濟
需賢哲列宿在草莽紫薇光髣髴天鍾運籌人何
時見功伐

鼯鼠潛神丘鵲雛集高枝區區保性命二虫曾何
知哲人無死地所至福履綏以茲七尺身爲君作
若龜赴義不返顧成仁無推移天狼紛下食中土
爲肉糜予爲民請命大呼起瘡痍事成天地悅事
敗鬼神悲乘道而浮遊無須駕鸞螭妻孥乃敝屣
已矣從此辭

蘭叢盛枳棘鳳穴鄰鴟鴞利害日相摩金石爲之

焦仲尼探虎口距也方矜驕仁義爲盜積天下誰
宗堯驅車以放志言觀東海潮波濤飛雪山河漢
垂天橋蛟龍隱文章尾間水潛消寧無百尺絲吞
餌惟游鱗白雲來何遲俯仰託長謠

蓬頭諸劍士颯颯曼胡纓十步殺一人雖勇無功
名我有軒皇書陰陽爲甲兵道大難爲容浮沉傷
中情大盜爲諸侯卞隨久捐生神龜嬰余且騶虞
五鼎烹利器乃假人天下何繇平悠悠義農初無
爲孰與京

庖人烹赤魚魚尾何離筵風雷起神鼎俄然摩天
飛冠霞登紫宮驂鹿上蘭池遨遊經四解回顧傷

黍離潛龍貴勿用粃糠爲帝師至道久蟬蛻七聖
莫能知悠悠具茨雲吹笙何參差

王母有小女其名爲婉羅教我玉胎篇俯仰餐太
和玉顏爭皦日吐詞如鮮葩神明所膏沐物物成
丹砂還開偃月爐純陽生紫芽合散皆文章一氣
如朝霞神仙多談諧與龍爲變化出入太無中真
道若不華哀彼世路人白髮空婆娑

山人酌流霞浮杯萑蒲溪笑我不肯飲容顏無光
輝桃花恃春陽采柏有霜威白雲多變化詎隨鴻
鵠飛請謝陰長生何戀紫房爲吾心似秋月皎潔
誰能知

芳風起池塘花逐鴛鴦飛明月何娟娟爲君揚蛾
眉請彈石上琴更酌黃金卮蓬萊水已竭麻姑髻
成絲芙蕖自有英何慕采楸爲余楸凌霜雪虛名
將安歸

危冠切青霞長裾掃八裔我豈學遊仙逍遙自無
外日月在掌中收來有六轡顧謂王子喬至道須
神契四海如鏡明何勞去昏翳

溪谷何多風猿猴鳴相追兔絲無斷絕百尺緣采
枝調琴苦絃急望遠苦心悲斷髮逃荆蠻三載不
得歸豈無骨肉親金盡天性虧世路皆太行履道
吾何之神鸞冲高天母使鸞鳩欺

方朔乃歲星遊戲栢梁臺王侯若艸芥嘯傲凌采
崖招搖履爲綦滄海持爲杯旣笑首陽拙復卑柳
下才專氣而致柔與世爲嬰孩予亦韓終流騾鹿
相徘徊千年鍊金骨雙髻象蓬萊安用天下爲道
遙以無懷飛龍擘河漢驚馬淪塵埃

陰陽迭遷謝人世悲蜉蝣命我雲螭駕逝將登不
周饑餐茗華玉寒披九鳳裘井水無大魚新林無
長楸紛紛彼婦口乃爲君子羞鮑焦已槁死強羸
吞諸侯傷哉仁一衰奸雄皆竊鉤仲尼無斧柯龜
山空夷猶

九州何茫茫吾獨哀無女綏綏塗山狐九尾難與

處服我瓊琚衣鳴琴臨北渚湘妃雖目成自媒非
所許盈盈匏瓜河蘭蓀媚平楚懷修追有鰥寡裳
聊容與

朝露畏太陽高梧忌秋霜嗟爾綺紈子歡樂焉能
長勢利一浮雲人命如流光人鬼互相代誰能出
陰陽放志以遨遊行行至太行車馬屢傾覆我心
終不傷高鳥凌霄飛日月在其旁榮名非所慕保
此歲寒芳

初日麗垂楊朱樓臨大路纖纖彼女手當戶裁紈
素雍雍雁南遊遺音落滄洲美人恥歌舞篋笥疊
衣裘衣裘有時著孟冬清霜落皎皎薜華姿歲寒

逾綽約道勝忘紛華心遊貴恬漠

玄黃何烟燼塵埃間白雲含此茗華姿獨行無與
羣天鑒詎孔明玉石鬱未分兔絲織爲衣燕麥持
爲殮凍餒不能語爲節何艱辛駑馬食龍芻一日
成駢麟曜靈不棄予屋漏垂陽春

鴻鵠何蒼茫背負青天飛白波捲滄海聲如鬼神
馳予時彈雅琴成連嗟不歸回風翻木葉斜日懸
江磯淒淒水仙吟中曲斷朱絲四望悄無人天吳
方躡跼神物有變化至人能推移拔山豈無力梟
雄吾不爲慷慨髮衝冠傷哉失路悲

送妹

翩翩東萊燕銜彼棠棣華我生鮮兄弟鄉閭嘗咨嗟
令妹主璋姿教誨荷親慈採桑提玉筐織素鳴
春機織織彼女手朝夕供甘肥青春日載陽睢鳩
差池飛家貧不終養臨別淚漣而虞舜畊歷山伯
瑜披絲衣嗟予棄人爵與親昵舖陳

青陽屬令辰來雁鳴離離朝雲媚桃李乳燕棲房
櫳窈窕彼君子佩玉乘青驄朝爲孤鴛鴦暮作雙
飛龍子懷在高逸偕隱宜梁鴻絺綌勝鮫綃荆簪
玳瑁同箱簾無寶玩圖史盈其中芳顏匪膏沐令
德惟溫恭先人箕潁流黽勉追素風

黍谷

步出銅馬門遙望大房山幽燕有奧室鬼神潛其
間群峰鬱崢嶸溪流何潺湲猛虎飛食人長嘯隨
風還凝冰折林木玄雲蔽河關維昔鄒衍生懸河
此談天一爲吹黃鐘幽谷春陽旋至人御六氣呼
吸走百川是非總天籟悠悠誠何言天下久忘我
無勞烹小鮮澤雉有飲啄優游聊終年

出永平作

洪河無停流驚枝無栖翰志士生亂離七尺敢懷
安青萍不刈黍明月寧沉淵斷袂別親友成敗俱
不還誅秦報天下一死如泰山寶馬與美人鳥足
酬燕丹驅車出盧龍迢迢度渝關二水交深漆千

峰連賀蘭征蓬自迴轉去雁群飛翻悲歌弔飛將
聲振長城間猛虎爲我嘯玄猿爲我歎奚兒動成
群箜篌對月彈彌令遠遊子側聽心哀酸

登軒轅臺作

邊風起薊門黃雲高嵯峨予登軒轅臺四望發悲
歌哀哉帝王都城闕如丹霞朝陽開露掌閭闔搖
金波碣石懸天柱桑乾接銀河真人茲建極億載
詎云多誰令羽林兒一旦倒長戈遙遙開塞路朝
暮驅橐駝橐駝安所負美人如桃花淒淒當落日
莽莽揚風沙龍髯攀莫及玉女舞婆娑天庭方晏
樂寧知予咨嗟

出塞作

邊秋多風沙狐兔長悲鳴慷慨思奢牧因遊雁門
營飢食太行薇渴飲桑乾水問我亦何爲壯士不
顧生生騎一駿馬權奇如龍媒追風數千里直上
單于臺東望朝鮮江北望白龍堆凌颶發長嘯遊
兵射我來左手接飛鏑右手揮金鞭馳歸錦州城
汗下如流泉念此血氣勇毋乃非聖賢忍恥古所
尚留侯亦迺邇長采寒逾勁南金鍛彌堅啓篋讀
祕書聊謝諸少年

擬渡三岔河有寄

遼東苦寒地十月河已冰我從遼西來驅馬冰上

行回望巫閭山千里陰氣凝明月出黑澗蒼茫炤
孤征疑兵四面來但聞簫聲行行迷失道誤入
骨都營飢渴向妖姬乞得駝餘羹馬乳飲苦酸魚
皮衣苦腥神龍困螻蟻勺水不能興鳳鳥失其群
見辱海東青因憐雪窖中持節有子卿題書託飛
雁雙淚如雨傾安得同攜手以解流離情

贈遠

美人如花飛玉佩冰綃衣長風吹欲墮攬帶前相
持問子遊何處笑含碧雲姿言我華陽來將從勾
曲棲麻姑久相待去去與我辭語卿且莫辭我有
芙蓉池鴛鴦戲碧葉翡翠巢金枝願將天上月長

招雙蛾眉

采菖蒲作

菖蒲何芊芊鬱生南澗曲三花凌紫煙九節削青
玉采采臨寒泉因以濯吾足死生雖已齊長年亦
所欲仙人安期子與爾聊餐服

贈友人

英雄耻割據拂衣遊江湖我爲沉水香君爲博山
鑪紫煙揚光彩丹成凌仙都仙都雖宴樂蒼生嗟
未蘇紅旗如雲霓錦帶曳芙蓉利劍在掌中出入
風雷驅蕭曹刀筆吏項羽乃匹夫苟能拯水火何
辭七尺軀王侯如敝屣山林堪長娛

悲風振宿莽貧士方寒飢悠悠天上雲長借明月
輝嫫母已衣錦南威長刈葵喬叅生路傍不如彼
蒼施彈我丘中琴髣髴孤鸞飛落花如美人翩翩
來何遲仰視雲間星牽牛光獨微淑慝不同塗盈
虛良有時愼矣懷道符頽陽以爲期

灼灼懷春鳥銜花吳江潯玄豹久不食蔚然文采
溪風雲蕩天路邂逅抒憂心憑君青玉案中夜張
瑤琴明月照南浦晨風巢北林河精爲天漢小星
易浮沉妙道貴忘言達人無哀音持此箕頽懷聊
以荅所欽

樛木不下垂甘匏安所依嗟君富無驕乃與黔婁

期黃流在玉瓚大德在蒲衣佻佻彼公子安知天
爵爲今時方喪亂群盜爭雄雌授子以丹書揣摩
爲帝師神龍尚可醢駿馬亦可羈至人與天遊虛
無誰能知

煌煌我上天炤此豺虎驕我無戈與矛何能入山
樵石谿流濺濺蘋萍隨風飄游魚畏鵜鶘神龍樂
波潮仙童顏姣好迎我雙瓊簫東遊扶桑關西渡
絳河橋至道非無形如月懸中霄攬之盈玉手欲
贈彼嬌嬈人生如電影千載不崇朝念彼牛山涕
乘化且逍遙

贈山陰祁七

涼風吹竹篠攜手澄湖濱
言持芙蓉花插爾華陽
巾我亦浣紗人明粧炤日新
何當上蘇臺一笑傾
吳君明月豈長滿朱華
不再春徒懷陽阿曲寂寞
度芳辰

送朱十

昨冬洹寒時方舟同入越
君望赤城霞我弄耶溪
月月出香鑪峰光搖東海
雪美人吹紫簫一曲梅
花發梅花猶滿林君唱懷
歸吟未遊雲門寺遽別
天姥岑可憐雙白鶴相送
吳江潯冉冉芳春晚桃
李皆成陰貧女無刀尺誰
裁鴛鴦衾素絲亦易染
孤鳳難爲音願言秉貞潔
黽勉同我心

送王屋

神螭方魚服美玖藏沙塵英雄未遇時狀貌如婦
人贈爾雙吳鉤中有愛子魂君王讐未報豈敢顧
所親挫藥調君酒送送灞陵津數日炤河水悲風
激車輪去矣毋多慮男兒自有神

答譚非庸

嗟予邁陽九不得全天形接輿已髡首桑扈亦羸
行蘭艸非人鋤鸞皇乃自烹念君意氣存禦侮如
干城小人箕其舌君子淵無聲經德不可回相將
保千齡

黍苗何離離雉求其妃咨予久獨立幽蘭爲餐

施今天降螽賊王事艱且危
膂力君方剛經營願相資
欲獵爲呼鷹欲戰爲騾驪
騾驪何彭彭西北開龍荒

寓山園弔祁忠敏公

園林午澄霽左右芙蓉披
浮舟弄清瞰遂至鏡湖濱
陽崖雲方散陰峰露未晞
再拜清泠淵淚下沾裳衣
吁嗟懷沙人守道無委蛇
築宮水中涖蘭橈鶯粟楫
金鸞開彩翠玉溜滴葳蕤
方懷安石賞遽與彭咸期
皇輿已敗績髮膚何以爲
浩歌赴長湍溯洄從九疑
容與凌明霞觸石體不隳
怒潮爲安流靡濡魚鱗衣
我祖維靈均冠劍鬱陸離
夫君交

手去重華以同歸玄烟橫極浦衝風激寒澌投篇
涕洟瀾日暮感舟師

衡山篇爲徐武子文壽

衡山有奇篠爲音何洋洋雌枝吐流徵雄枝含清
商美人摘朱脣爲君樂無方鳳將九子吟龍挾五
駒翔紫芝成宮闕醴泉滿壺觴萊妻共高逸爲壽
未渠央金庭連玉柱四皓所徜徉昊天母嗟嗟痛
飲以自彊

丈家近太湖

和陳元孝登吹臺作

夙聞太阿劒霜鏐蓮花發楚王一麾之三軍盡流
血夫君事遠遊家貧一崩緱千里登吹臺慷慨思

報仇夷門無監者誰爲公子謀我昔弔梁園所見
惟林丘洪河崩底柱蔓草連神州驚鳥縱橫飛離
獸鳴相求平臺賓客盡四顧淚交流憐爾多難人
徘徊當暮秋長歌蓬池上擊筑睢水頭

登石門懷慧遠尊者

雙峰聳天闕一水懸神池積石若朝霞連林多夕
霏丹溜含清冷鮮葩吐蕨蕤予偕二三子來自虎
溪潛矯掌承飛泉樞衣陟金梯蕭條遠公跡亭階
有畱基悵然增逸興方嗟哲人萎白雲開闔際忽
見金仙姿玉甌灌甘露龍策振靈輿回目流神光
示我青蓮枝揮玄入無朕俾爲萬象師

別王二丈予安

美人在霄漢灼灼如丹雲手持鳳凰子母乃魏元
君我昔登太山天門嘯不還瀑布爲長帶浮雲爲
高冠遊仙豈不樂悲此市朝間聖賢恥獨善所貴
匡時艱太阿苟不割蛟龍將波瀾篋中有陰符吾
生焉得閒平沙利馬足驚飈宜鷹翰遙遙萬里心
慷慨入長安

梅市別祁四丈季超

沈沈海月生嘒嘒寒蜩鳴遊子在天涯觸物生憂
情賴有二三友金玉同堅貞龍鼉互變化神龍喪
其形豈不思奮翼上天無雷霆昔我別慈親王事

勞孤征風雪歷四載謀深竟難成黃蘗與春薺甘
苦不分明至道尚可信寂寞元生平

桐君山作

清溪流瀼瀼白石如擣菹桐君去我久誰與同歡
娛利器亂天下濠梁日如愚白髮漸紛紛於世復
何須遠遊可長生逝將登蓬壺青霞爲繡袷明月
爲耳珠金火相盤旋神丹生太無天孫嫣然笑結
我合歡襦誓言何旦旦歲晏終不渝

答吳巨手

白雲何晶晶倏忽歸無形尸居龍不見與君共沉
冥黃虞久已沒吾道難獨清深谷何逶迤朱華含

春榮采采以療飢將游太上庭湯火煎太和膏梁
損奇齡浮沉日月中人命如流螢哀哉嵇叔夜多
才乃捐生

還故山作

誰謂客行樂歲寒無衣裳羈棲在枳棘悠悠思故
鄉步出稽山門乘春聊徜徉丹霞抱秀嶽珍木交
迴塘水鳥相和鳴窈窕皆鴛鴦人生道不存何以
持文章苟與太虛冥仁義皆秕糠南金一出鑛遂
爲貪者殃長歎辭世人飄飄歸羅陽

將歸省母畱別諸友人

海上三珠樹孤鸞鳴啾啾養子羽翼成翻飛向九

州九州一何曠回顧生煩憂尋仙蓬壺中謁帝崑崙丘繁霜隕百草瑯玕無晨羞慈烏能反哺鳳兮命不猶歸與守故巢戢翼爲良謀

良謀亦何有持道足娛親母爲天上月子如江中雲雲月相終始流光誰與倫翩翩兩海燕挾雛遊青春銜我蕙蘭花悲音何感人

感人惟楊柳飛花皎如雪如雪豈不芳所憂本根絕昔我與親辭五嶽將尋師乃覲姑射人贈我青蓮枝青蓮合爲丹能生明月姿豈敢自怡悅萬里其持歸

持歸明月姿皎潔無纖瑕朝含東海日暮膏赤城

八
卷八
霞重襲盤龍錦母使蒙風沙以奉白髮人一炤生
桃花如彼西王母長居太清家

太清何寥廓浮雲去不息呦呦野鹿鳴甘草不自
食如何舍友朋奮然思矯翼四海皆兄弟親兮難
再得循彼南陔間相思何終極

極望惟吳越吳越多山川玄豹藏深霧應龍蟠巨
淵神物必有偶磁石金相連離別雖須臾恩愛終
不愆遙遙骨肉情去如箭離弦

離弦去萬里烟波何渺茫朝與鳬雁羣暮隨明月
光仰視虛宇中衆星燦成行而我獨何辜乃爲參
與商人命在呼吸後會其毋忘

後會庶不移參商有見時紅日生滄溟萬物蒙其
輝矧我體道人金石寧或虧颯颯霜下草熒熒園
中葵敦彼後彫質歲寒以爲期

壽母

文武道未墜聖謨何洋洋我生獲胎教少小修天
常早歲負劒遊所希應帝王天命在庭闈賢母知
廢興年今至八旬靈壽自翱翔嶽蓮標獨幹婺星
流孤光母爲飛鵲鏡子爲蛾眉妝形影不相離從
今至千霜

題王丈舉陰書閣

太素有元精凝爲三芙蓉美人日攬擷彩翠餐無

窮白髮臨玉顏豈敢從飛蓬道德爲膏沐光彩開
童蒙人倫垂勝業含垢悲予躬老聃効已言大禹
裸而東昊天徒嗟嗟委蛇吾安終

酌貪泉作和人

朝飲貪泉水暮濯貪泉流廉夫不可爲仁義皆竊
鉤天方授盜跖吾介徒懼憂合浦多明珠朔漠多
貂裘仲尼思執鞭況我斗筭儔

詠張子房示諸生

淮陽昔學禮故能敬老父長跪納履時彊忍甚可
取少年雖任俠喜與老人伍四皓奉手行不敢越
規矩所師盡黃髮深藏若處女甚悔博狼沙徂擊

徒豪舉

爲故黃靖南侯叅軍陸生作

仗劍出門去高堂悲不勝
嬰母旣知廢陵母亦知
興送子涉淇河倚閭淚沾膺
黃雲驅匹馬驚風擊
飢鷹努力叅卿軍智謀夙見稱
報親在何所沙塲
奮猿肱屠毒天未厭髦頭國方興
矢不敢射貪
狼日憑陵豪雄致帝怒禍患來相乘
哀哀皐魚痛
使爾肝腸崩

趙陳二烈女

二烈女一曰趙金娘高要人其父名星還丙申
女年及笄賊至罵賊引簪刺吭而死一曰陳氏

者高明人其父名昌第女年十六許字譚氏子
甲午滇兵至脇以白刃女痛罵求死兵不忍殺
之女以頭觸石碎腦血濺兵怒乃殺焉弔曰
魯女倚柱吟憂國無人知妾身逢喪亂志節聊自
持羅敷雖靡匹秋胡寧爲期吁嗟爾元愍安知禮
義歸猛虎尚可馴神鸞終不移拙吾玳瑁簪可以
刺熊羆天道故禍淫氣稔吾不爲珠沉靡點辱玉
碎餘光輝對君刎繡頸去去從湘妃

求二橋山人畫三閭大夫像

先生懷姱節寤寐見古人凌朝漱九陽爲予貌靈
均曲眉象珠斗姣衣飄春雲雲中嬌含笑望如扶

桑君正氣得所繇變化皆吾真下爲蘭杜滋上爲
日月陳子其虛以待鬼神將來奔其小入無內其
大廓無垠

贈陳十一

金瓶連素纒百尺汲寒漿清冷滌塵垢何減流霞
觴城南新賜第貴盛如金張昔作騎都尉今封右
校王膳脂駙塞馬芍藥艷吳娼漢恩豈獨薄天道
終有常吾子抱忠信誠爲百鍊剛沙頭且射虎颯
颯凌風霜

茹荼甘若薺慷慨荆蠻地猛虎不忍射愛彼爪牙
利築臺南嶽陽丹火流扶桑仙人多劍俠起舞佐

霞觴填填豐隆鼓咽咽右英簧雙龍繞指柔俄爲
掣電光驚風逐千里澥水群飛揚劃然君一嘯爲
樂何洋洋我亦白猿儔相逢聊翱翔

贈別武昌陳子山昆弟之作

江漢何滔滔其神足綱紀大別如長城中分南國
水君家高冠山黃鵠當門峙形勢雄湖湘人才爭
鬱起昔我客漢陽求友得一士羅以豈知君弟昆
乃在吾桑梓伯仲珪璋姿青雲翹玉趾所得鳳皇
毛多分諸季子三百日絃歌情禮爲終始賢父師
於家金玉相條理揚粵觀人文化成察所以顏曾
昔童蒙造道莫能止年少聖所畏慚予將暮齒清

夏珠江湄飲餞交壺矢執手情依依所贈惟瑯藥
我本荆楚人秭歸有故里先臣居屈沱女嬃砧在
彼安得從君歸三閭陳簠簋漢家重楚聲離騷多
所擬君爲宋景徒努力事蘭芷

垂老

垂老心多憂飲酒未嘗旨上憂憂老親下憂憂稚
子稚子始匍匐其一六齡耳長者及九齡已赴黃
泉矣次者葬秦淮下殤以瘡痍兩女亦嬰孩飢寒
殊未已呱呱滿膝前無錢致餅餌我生拙經營甘
貧已三紀采薇成不仁潔身累妻子誰使廉夫剛
鮑焦終槁死

死者日以安生者日以危旻天何不怙人命輕如
泥玄雲一翳鬱白日去安歸長夜終不晨膠膠勞
鳴雞我生慕夷皓垂老益調飢苦節同妻孥拮据
難自資絮巾布襦裙單複亦隨時薄饌薦先公淚
下如縷縻不義而富榮母乃辱親爲

衣敝何嘗補履決何嘗組勉力糜粥同艱難事慈
姥叱咤及犬雞親前敢有怒深愛在婉容白頭若
孩乳有婦布襦裙割烹未爲苦膝前黃口兒不使
分餘脯

詠古

漢皇有神器光明長盛實白氣鬱成雲狀若龍蛇

出太白精所凝一揮天下一自斬白帝子血光
如漆本以詐力雄湯武非其匹猛士無韓彭四方
豈寧謐威加海內歸霸圖有得失慷慨泣數行悲
歌風瑟瑟時無周旦才誰與陳無逸

諸葛王佐才乃慕樂將軍燕昭本姬姓豫州亦懿
親齊破將尊周霸業爲桓文爲燕振積弱周命亦
維新天王威一奮六國仍爲臣燕號爲宗國西向
制強秦孔明爲劉氏與樂同一身帝蜀豈本懷漢
業徒三分悲哉孝獻沒一日能無君元年紀章武
掩淚當秋晏

與諸兄弟飲射作

翁山詩外

五古二

三

鯉魚何盤盤瓠葉何幡幡弟兄相燕飲其樂如新
昏戶庭無外侮絃歌有餘閒人生無幾何骨肉相
好難兄友而弟恭所以承親歡親歡承不足張侯
在中谷兄射中熊羆弟射中鴻鵠鴻鵠比其翼熊
羆同其力

留別羊賊諸子

大魚啗鰕鮒小魚啗沮洳風波一失所微沫猶相
濡吁嗟爾君子念我如黔婁養親無甘毳從君無
驪駒懷寶而迷邦前路多憂虞王孫誅淖齒伍子
干闔廬所愧病無能日暮空踟躕

枯魚日銜索高樹多驚風我親已白髮我行猶憊

蓬仲繇嗟負粟冉子念尸饗攜手出東門淚落塵埃中蛇脂已耆乾龍飢尚未克耘瓜忌傷根結蘭貴心同孝子當不匱錫類及微躬

孤燕篇

并序

涇陽趙元溪之母劉孺人者年二十而寡剪髮內其夫孝敏先生櫪中執節三十餘年事舅姑教子德聞遠邇有一燕歲來其室不巢不偶宛頸空梁嗟夫飛鳥尚然哉爲賦孤燕篇

燕燕昔雙飛銜花何差池皇天命早寡雨淚毀容姿與君如日月光景不相離與君若涇渭清濁必同歸鬢髮剪無餘玉棺叩且開傍人相慰留黽勉

陶嬰爲上念養公姥下顧黃口兒

葳蕤女貞樹舍此少陰精歲寒不凋謝高行通神
靈孤燕何啾啾挾子飼其英鳳皇心不樂烏鵲甘
伶俜託孤昔所重從死今所輕子旣羽翼成母儀
萬方盈母爲月經天子如太白明

贈友

魚目似明珠陽貨似仲尼苟非明哲人安能辨幾
希嗟予久飛遜墨名行殊非朝行膾人肝暮行奉
紫芝吾子不遐棄狂簡其同歸隆冬不肅殺陽春
奚光輝披裘入裸國優哉聊娛戲
甘匏抱苦葉菑齒含汗泥子推身已隱焉用文章

爲露華零蔓艸觀爾清揚姿曠世無奇服瓊琚非
所宜攜手登繇山念我蛇無脂神龍尚飢渴君豈
有蘭飴蘭飴無使露淵塞秉其私

我本接輿流被髮歌鳳衰時無魯仲尼狂簡將何
歸六經久榛莽諸子多淫辭嗟予非先覺斯道將
陵遲狂瀾思砥柱疾風宜勁枝嘉子方少齡顏閔
能爲期直如麻中蓬皎若霜上曦烹魚爲漚鰲射
虎爲張機堂堂並爲仁棄我莫如遺

桃蟲化爲鵬羣飛啄九州鳳皇集于蓼饑渴常懷
憂與君志天爵仁義交綢繆惕厲處明夷保身隨
波流瓶罍貴相資箕畢貴相求美人乘白雲崑崙

去悠悠吾將爲造父往御彼驂駟

日月私照臨我食恒無餘絕塵天下馬今乃伏鹽
車美人如驚鴻飄颻過丹虛神光倏陰陽欲攬無
瓊琚崇山蘊寶玉滄海含龍魚雲霞苟蒸液變化
在斯須食德爲膏梁服道爲繡襦勗哉爾君子毋
效彼遽蒞

黃鵠何雛雛單遊心傷悲美人髮無旗君子佩無
琚蕭艾盈中林予蘭將安依驅車適西吳廡下斂
光輝昔爲清水珠今爲濁涇泥吞聲行躑躅願子
相提攜

黃山有溫泉日月所流精飲之生羽翼飄颻如容

成文章若雲浮五色爲天經三閭變風雅好色成
仙靈輕舉含道真顏如薜華榮我持遠遊章被之
雅棗聲爲君千金壽相與娛生平

讀顧子忠紀賦贈

蘇合何氤氲非煙亦非雲我爲銅鑪器與子日三
薰美人臨九天光彩如東君傳說託房星精華垂
大文願得俱翱翔冠蓋絕塵氛大招匪荒淫風諫
同三仁重華可折衷何求時俗聞

伊予遘亂離爲詩多變風秦庭昔鶴立痛哭人誰
容從俗以偷生神仙託其踪須臾願無死以觀宗
國終君子厲明德邂逅欣心同蜿蜒爲文章皇頤

非雕蟲大道所周流敬哉爾天工

顧善篆刻

題中茗青畫

黃鵠在天地一舉知圓方遊仙未解憂時時思故鄉志士貴成仁枯喬非我良衆人樹苦桃君蘭實不成衆人重魚目君珠黯無光游藝爲丹青山川日徬徨晻靄如鬼神雲霞出中腸離憂翳蘿木陽谷不垂光磨礱方慕類與子聊低昂

寄祁四丈西廬

桂樹含炎德敷榮霜霰間欵冬花嚴寒相與同貞艱峨峨冠浮雲鏘鏘鳴玉環惠而君好我攜手會稽山仲尼如日月光華爲我顏老聃其猶龍變化

在子閑

子閑多龍駒食我玉山芻文章天所授五色爲子
娛白鹿雲中翔鯉魚九淵居高淡不可恃久已克
庖廚嗟余薄長生成仁心所須潛神在玄默與道
爲隆污吾子獨全歸壽考保無虞

詠懷

谿谷何清涼迴風以飄忽荷襦易凋零不如服狐
白曠士貴和同蟬蛻仲尼迹粟凜冬冰凝何如春
冰釋我已穢玄珠離婁不能識我已摧號鐘師曠
不能釋美人如游龍纖腰日玄折一低而一昂人
以爲臣妾

再送從弟無極

秋天今肅殺山林淒且涼遊子臨歸風憂心以多方皇天若浮雲報施何靡常黃鐘委塵垢甕甔登明堂吾生既不辰子亦命無良雄翬而雌翠今朝難同翔哀哉骨肉情臨別徒徬徨

陰陽有綱紀夫婦人倫始葛覃恐失時標梅求庶士子歸娶齊姜及此春冰弛慈姑嗜魚鱸施罔在河水恩義相纏綿琴瑟爲親喜我有不肖軀因依無葛藟何以事高堂孝德慚君子

贈諸氏兄弟

朝登鴈門望殺氣從西來在天爲黃雲在地爲黃

埃吁嗟我遊子悲秋行徘徊披髮而吹簫聞聲令
子哀子情如醇酒日酌我金壘子詩溫且潤日饋
我瓊瑰弟兄相宴爾攜手臨高臺倚倚合歡竹枝
葉交山隈願言靡離別千秋慰我懷

和友人度昭關之作

端居苦離索思君蕪湖間忽聞昭關詠感激淚潺
湲丈夫不得志飢寒行中原斷髮投爐中爲君鑄
龍泉器成不見御雌雄各沉淵登高望四野亭障
何連連驚風折旗幟落日迷山川誰知遠遊子鳴
咽不能言維昔吳子胥吹篴誠足憐一怒覆強楚
父讐不戴天解牛宜薄刃驅馬貴長鞭苟能勤耘

耕何必求膏田亮懷鷹隼羽時至自飛騫勉爾慷慨人遙遙託贈篇

贈張文谷孝廉

橘柚貴素華匪尚葉葳蕤鳳凰苟成德何用文章
爲秋霜日凜冽白髮穠光儀學道久未成吾生將
安歸吁嗟爾君子六經縱橫施離騷多夸誕變聲
蚤能知發憤事聲色神仙遑與期浩浩仲尼徒德
行臻庶幾願言誘狂簡棄我毋如違

荅譚非庸

采菽需筐篚爲仁貴朋旅盈手瓊瑤華夫何飢季
女季女多徽音其諧如瑟琴乾餱非失德棄我如

飄風白首始成歡君能同錦余鬚爲龍淵雌雄
相升沉雖無金玉相追琢亦能任

猛虎篇

猛虎不食人食人必豪賢爲天生羽翼飛渡大河
聞我弓旣已良我馬亦已閑踟躕不忍射恐非天
所安天安惟猛虎作威予敢侮腐肉如山丘所甘
惟肺腑猛虎不見人見人則不取所見盡禽鹿人
立而麋麋肥者噬無餘瘠者以爲脯麒麟與鳳皇
不足爲糞土

鳳凰肉不甘麒麟肉不肥猛虎亦好生何不食
麋鳳鳥乘於風爲皇作威儀麒麟乃仁獸生艸不

踐之上天命猛虎威向豺狼施如何餌靈物口腹
亦細微生懷腥臊德炳耀徒留皮吁嗟爾猛虎哮
吼誠何知

答王生

二女佩明珠順風翔蓬闕朝霞一膏沐娛光流如
月園桃何夭夭秋霜徒磬折嗟爾華門子獻玉悲
三則崇蘭忌當門甘泉必先竭布衣可終老濮陽
有芳節請誦伐檀篇十畝聊怡悅

爲梁生壽母作

金盤膾嘉魚玉瓚酌黃流爲君壽聖善歡樂盈林
丘孝子貴修身天爵爲公侯非義而富榮毋乃貽

親愛不逢堯舜禪甯戚終飯牛嗟予亦有母欲養
無珍羞采蘭不盈掬中道化爲鶩雞鷺日爭食鳳
飢鳴啾啾勗君孝不匱永錫爾同儔

題王子省齋

鵲鵲何友悌飛鳴不相離王睢聲相求貞潔慎所
妃君家多弟昆金玉交光輝精神見山川令我樂
忘歸君愛我離騷洋洋風雅遺聖賢貴發憤哀樂
爲人師爾躬日三省經術是憑依髣髴見先王忘
言在隱微

贈大毛子

煌煌太華荷玉顏照萬方昔余乘白雲攀折日翺

翔國風樂不淫小雅哀無傷恭承皇降衷好色成
文章審聲知清濁聽曲辨興亡吾子乃延陵聰明
不可當子爲清廟瑟神人久和康朱絃而疏越吾
其繼後行

咏梁子六瑩琴

太冥有寒桐瓊幹含黃鐘鳳皇何秋秋爲君結流
風我爲園客絲纏綿玉軫中玉軫有時折朱絲無
斷絕大絃含幽蘭小絃吐白雪鼓舞盡神明庶以
酬先哲

天泣

天泣一何哀鳴聲如轉磨無雲乃作雨淒淒淚交

墮悲此下土民斬刈遭殃禍仁聖不降生天地日
多過我生抱忠誠與天素相左俯仰愧忤多死生
無一可茫茫飢溺懷淚下悲坎壈

誰謂

誰謂蒼天高我行曲其躬履霜惟葛屨爾電無青
曉遲遲塵壒間慷慨誰相容吁嗟爾君子攬我如
芙蓉持華贈子克持葉贈狂童

鄧氏丈壽辭

方今斗牛墟老人星實見其下多壽耆皤皤復耆
彥我公生番禺實乃天所眷弧南一老人光茫射
赤縣乾坤歸火主汝當師保薦口授壁間書官中

賜銀絹太和作口實自養幸毋變膏粱豈朶頤飲
食人皆賤

擬古

人生無百年命在呼吸間長風飄落葉一去不復
還人鬼互相送陰陽不少閒天地豈不仁人物自
相殘吁嗟世道喪吾生日已艱寥寥舍道腴所潤
惟容顏甘肥久已絕疏食餘一簞回也日閉戶禹
稷同心肝

留別槎山諸子

絺綌含凄風葛屨濡寒霜我行一何窶岐路復亾
羊白駒在幽谷行行悲迷陽吾子陳瑾瑜爲我樂

不祥日月居東南沐浴成文章予技非雕蟲爲天
補袞裳彤管何光輝貽君殊未央

有鳥篇送妹

有鳥名蘇耽千載蓬萊還爲親植朱橘離離成神
丹孝子貴錫類天性誰能殘子慕秦王女吹簫心
孔閒幽貞少不字學道懷驂鸞牽牛俟銀漢匏瓜
期絳天日月一夫婦交會相廻旋子今勉于歸及
此冰猶堅陽雁喜朝日天桃矜春妍雞鳴警君子
夙夜禮無愆尊章益虔事當得王母憐

混元生兩儀四象運璇璣民生有儔匹陰陽聖所
師嗟爾幽閒女于歸今及期琴用先人桐張以所

縹絲一彈再三鼓鳳凰鳴參差明月喜幾望受日
逾光輝服德爲黃裳樂我惟縞衣靈仇天所眷敬
爾百威儀

送鐵井子

葵生知向陽梅吐必南枝嗟爾遠遊子擇主將安
之玄冰結大漠白日傾崦嵫懷寶不自衒所恃璠
璣姿維昔越溪女紅顏揚光輝采采五色絲織成
歌舞衣朝詠梧宮秋暮爲香涇嬉佳人重意氣一
舉沼吳歸

詠懷

我昔夢華胥扶搖凌自然神氣何混茫揮斥氣

巔崢嶸下無地寥廓上無天大鵬張兩翼東西覆
群仙朝霞開北闕旭日懸高旂狂吟太和曲王母
笑容妍五嶽相鼓舞來迎雲翩翩至人本遺物靈
區將窮年

贈別查德尹

君之父與兄與予相友善父也歲寒姿柯條蒙雪
霰松栢天所私青青長不變大冬愁凝陰微陽難
與戰潛神在九淵龍螭誰能見我亦歛冬花苦寒
相婉變春日未載陽甘同萎草賤相別未幾時溘
焉朝露先豈謂覲夫君先人儼顏面髣髴黃鐘聲
有光目流電肥瘠亦不殊天形妙相踐長短爭秋

毫釐少亦連卷識者盡驚喜性亦同狂狷文章若
孔鸞珠毛相貫串黃者如金錢白者如綃練自鑄
倖爾辭六藝作釵釧吟言自迴環不嫁惜嬋媛盛
飭將有行未能舍環瑱太素在中央絺繡四爲緣
易爻尚白賁詩風後繪絢先公所教勒夙夜惟經
傳明將于國雍寫書自供繕貽我外家語摩研當
無倦

送五弟還里

子行歸故鄉劬勞將父母雖無金滿籩有友貽瓊
玖吳越多秀民襄陽足耆舊稱詩相歡娛爲情若
醇酒謂我兄弟賢無忝三閭後攬執芙蓉袪纏綿

大道口

大道直如弦汝行勿廻曲騏驥少壯時飛揚苦不足所難中規矩千里自拘束北風安可依塵沙爲我辱豈無水艸甘未免爲臣僕寧爲越翡翠銜泥日三浴

詠阮嗣宗

阮藉英雄人高逸非其志驅車臨廣武大笑楚漢事飲酒以輕生杜康知此意鄰家有好女薜華傷委地慟哭涕滂沱情深豈妖媚長嘯若鳳鸞亦乃途窮淚嵇公薄湯武遺曲廣陵墜越禮逾矜慎言懷務閔肆當日竹林賢沉寘惟爾醉

送江太守還柳州

柳江在城南清接黔中水甌駱一都會諸蠻所綱
紀太守汝多才文武爲張弛吁嗟喋血餘未忍事
鞭箠東下牂牁來瘡痍別千里須臾失襁褓盼盼
勞赤子良馬早還歸殷勤迎玉趾片言肉白骨彼
妹何以畀飲餞崧丘旁稱詩惟孔邇

王夫人殉節詩

有序

王夫人者順天宛平人錦衣衛指揮宗公某之
女永寧侯王公道化之介婦左軍都督府都督
同知王公蒼籙之妻誥封一品夫人崇禎十
七年三月十九日賊陷京城夫人聞
皇帝

皇后已崩立召其子肇桓肇極及二媳馬氏肇氏第二第四兩女與男女幼孫六七人同至後園井側向北哭拜諭之曰吾王氏乃孝靖皇太后之外家光宗熹宗及今上皇帝皆所自出吾君舅以親封永寧侯吾夫以蔭官都督於外戚中可謂極其貴盛矣今者皇帝皇后慘罹大變以身同殉廟社吾家三朝啓聖兩世蒙恩肺附之私誼同休戚今者闔門赴死骨肉同沉以報皇天后土以殉皇家於恩義方爲不負汝曹一一聽我言皆拜而受命夫人乃命肇極先送二媳二女及諸男女幼孫悉

入井夫人乃同肇極入井繼而二婢亦入有家
人闔者四人聞知疾入井先引其孫炳文第四
女及肇極輦氏以出餘覓不見賊汲水飲水盡
赤使工淘之其家人闔者應募盡出諸尸井中
瘞之四月晦賊去肇極匍匐改殮夫人及媳馬
氏第二女顏色如生乃祔葬于玉泉山祖兆肇
極乞予詩表章予爲廣徵同人而先爲五言古
詩一篇以倡之其辭曰

嗚呼歲甲申 皇朝嬰大變 天王死 宗社苦
爲諸侯先誰從 烈后妃厥有邦之媛君舅永寧
侯外戚稱祥善夫人爲介婦早寡勢顏面攀髯大

小臣哀哀同白練夫人乃九淵湘君相婉變媳女
牽衣裾諸孫抱環瑱相從露泂中玉漿寒輾轉血
射驚鮒魚魂浮助龍戰甕敝觸肌膚泥深苦吞嚥
沉瓶激哀響飛綆爭幽牽波濤忽騰湧吐色如紅
茜賊奴不敢飲傾瀉手長顫匍伏窺潛源洞門如
或見冉冉媵文魚翩翩翳羽扇玉甃發神光笑口
流如電蟾蜍銜耳瑤苔藻生金鈿精靈處太陰水
府開宮殿再拜輓轡旁開漈虞天譴玄泉引杳冥
素華四相濺瑤甕以龍騰灑激如霜霰終古此圓
淳上帝可盥薦玲瓏玉檻施更作銀牀徧娥月在
中央女星相貫穿照膽恐生寒美人目流盼桐華

落繽紛水艸何蔥蒨乳脉多潛通出雲動成片宜
誰此影蛾羅敷是其選

虎門觀海作

朝自扶胥南萬里窮泱泱溟波接百川傾瀉多奇
狀潮從虎門出勢到沃焦放祝融在陰墟天池正
相向天命南海帝來從南嶽上宮闕臨扶桑百王
所禋享元氣一吐吞日月光相養混沌在中央精
華資醞釀咫尺天河通浮槎日來往丈夫朝飲牛
牛口吐溟漲渚邊多織婦微聞弄機響八月水益
大吾欲浮演漾槎從海若取食須天吳餉倏忽至
雲漢客星忒摩盪撫手笑黃姑獨處徒惆悵

答陳宛平

與子結交初有如天上月三五光未滿已憂蟾兔
闕浮雲不在多蔽虧在毫髮沐浴天河水金波期
不沒君爲啓明東我爲長庚西與月相終始黽勉
至晨雞

五十尚無聞豈敢爲人師區區章句末腐儒吾不
爲天命在渺茫垂白猶未知老萊事嬉戲自視如
嬰兒君顧我蓬蒿存問及孀慈茅家苦貧窶供養
無肉糜有雞若鸞鳥有黍如蘭飴君爲舉匕箸不
忍棄寒微感茲情意厚久要以爲期微塵撼舉嶽
蟻穴潰金堤人言貴深察強恕有良規

答李緩山

昔在建陵時與君嘗不寐
干將徒出匣宰割難自
試紛紛驚鳥者千里先騏驎
君擊唾壺缺酒酣益
涕泗神勇笑荆軻乃爲燕丹使
不與漸離行七首
無成事沉沉夜漏長
棋局消神智英雄亦反覆
一子勿倒置亞夫苦持重
諸軍患兒戲烏合取勝稀
皇皇徒逐利壯心一日暴
十日寒頻至拂衣沔陽
湖君歸如脫屣賦詩向白蘋
垂釣持芳餌雲夢吞
吐時洞庭爲酒器遨遊至五羊
尋我屠沽肆相見
卽言易剝極見天意乾坤一碩果
萬物所從始貴
以土德厚栽培無老穉相望及春陽
雲雨同行施

尋墓詩爲徐護衛作

嗟君何不怙十一喪而母四十不知墓匍匐來隴
首珠江當其前龜峰在其後蔓草旣已平牛羊滿
林藪號泣依旻天水漿恒不口神明欲告人不向
著龜取著龜亦不知精誠自相偶白骨忽踴躍潛
寐黃泉久淺土二尺中待兒陳絮酒孝思所凝結
玉紅自不朽心作漆燈光耿耿懸培塿一穴乍明
滅莓苔積已厚螻蟻所盤旋咫尺勞相守昏絕忽
僵仆山鬼牽左肘肘下卽薨棺闕地大逾斗剝血
何淋漓涓滴歸無有白骨忽復肉生氣懷中走幽
明一呼吸生死相爲壽薰用都梁香驚精返窓牖

西王好戴勝麻姑未蓬首喜見出腹子丈夫頽而
黝才氣世無雙豪傑效奔走顯親始羽林養志勝
肥壯石奮性恭謹厠膺昔在手老猶孺子慕仁愛
及諸舅靈爽所憑依重封庶不苟錦綺襍縱橫芳
香相雜糅重招先考魂嫡妣同樽缶黃沉雕琢之
血花塗左右高作馬鬣形合葬仍茲阜淚作一泓
泉身為白楊柳陰風長蕭蕭石馬助悲吼行人紛
掩泣看爾土親負賜祭會有時湯沐百餘畝

爲陳母姜太夫人壽

夫人年七十有子才且賢迢遞八千里顧我東臯
田愛親及我親仁孝情相宣左持一白鷺右持一

豚肩僮僕奉樽酒酒乃惠山泉爲母千金壽申以
南山篇感激仲子賜光生深井間忠養方有愧敢
當不置言惟君能錫類施及恩纏綿我欲壽而母
無物致拳拳惟有一片石可以明貞堅令子珪璋
質攻之期不偏友道在追琢所以娛高年夫人百
齡時我當來幽燕跪將吾母命並上肉芝鮮今且
養鵷雛待之啣綵箋

采藥西寧承張大令使君命其姪孫豫表陪
探燕子巖大峒龍井諸勝

瀧東與瀧西巖嶂蔽天起瀧西林木深窈冥數百
里城與白雲爭所得尺有咫猿鳥欺吏人峰巒壓

廳事開闢未百載夷椎尚多鄙使君造艸昧雷雨
自茲始仁聲務洋溢文教期光被我來聽鳴琴冷
泠匪山水先王風未絕詠歌日盈耳相賞在無言
唱歎亦有以郊坰富丘壑先導命猶子楓葉作香
飯笋籃代玉趾衣裳濕嵐翠杖屨沾泥滓石窟俯
身入洞天穿地底絕壁攀莓苔幽叢掇花藥奇葩
愛無名大藥疑不死猴藍旣蔓引鳳芳復披靡蘭
青翡翠同竹大籠葱似枯枯互支拄麝麝或騰倚
鬱雞驚出林白鵬冒其尾山鵬解媚人孔雀可驅
使飛厓畏足踐盤石若棋累方圓競相疊大小皆
竦峙鬼神所盪踏風雨或遷徙陟高眺錦石特立

牂牁吐玉表何峩峩翠屏復几几漢臣昔封植功
可銅標擬蒲桃褱宮錦五采絢崱施瀧西風望秩
山宗實在此羅旁九九曲勢至咽喉止洶湧千萬
嶂所賴一柱砥使君天下才今乃在蠻俚亦如陸
大夫區區至交趾峻極持谿高英靈作南紀注以
洪河流波濤沃瘡痍恩膏隨沓潮以及我桑梓湯
沐不在多錦石亦可喜肯錫一陂陀當盡樹蘭芷
來爲瀧西氓殷勤負耒耜

知州趙公殉難詩

有序

乙酉夏五月南京不守賊臣馬士英獨擁殘兵
千餘馬七八百騎號稱奉□太后南幸所過殺

掠不復用紀律至廣德州使亟嚴法駕具供張
兼獻庫中金萬緡知州錢唐趙公景和知其詐
裂檄不應士英攻圍三日夜城陷公奮罵不屈
以死

嗚呼國再亡其亡豈天作亡以一賊臣倉皇棄君
父半夜開國門三宮不遑顧詐言奉太后行間犯
霜露屠毒我民人豺狼寧有數疾攻廣德城相公
肆號怒太守抗兇威矢石下如雨爲國誅元慙衆
心恐不固勗哉爲國殤有身白如瓠腐肉何芬馨
烏鳶俾含哺七尺卽金湯作氣無朝暮畿南股肱
郡死守非無故頸血直射天賊臣亦崩懼亦以死

吾民代之齒刀鋸至今旄與倪涕泣猶縞素與彼

梅花嶺

史州梅國華楊州梅花嶺

衣冠兩封樹

贈別朱二陶

與君結相知一見卽膠漆是我直諒友爲心何篤
實讒言日以起所忤人非一君乃愛楚狂狂歌有
得失禿鶯啄鳳皇口血乾無日毛羽何摧頽交親
笑且啞都蔗不可杖徒然甘如蜜蛇牀不可懷能
亂薇蕪質白璧難久完夜光天所嫉努力爲不才
片言殺身畢吾友罕夾輔君行復倉卒士敗氣不
挫玉碎光逾出妖蠱僅一時吾道戒淫泆君去我
益孤相思成疾疾無人爲禦侮所恃兩賢匹季心

一手援鮑宣復相恤握手立斯須慷慨情洋溢
弱齡學古道垂老猶驕逸補過茲不暇君其加諸膝
君子愛同類豈敢爲私暱愷悌毋信讒所望諸僑
胥臨岐淚漣漣風葉爲蕭瑟

從軍行

我親疾痛餘頤養少甘毳手足苦不仁扶持賴兩
弟爲國棄庭闈此行傷進銳七尺遂許人天年不
遑計遠慚狗屠者好勇誠吾蔽親日旣苦短喜懼
心徒繫豪傑貴先人奮揚在乘勢利劒苟在掌卽
可操宰制獲報君父讎於孝乃不細努力赴戎行
介胄不揮涕上天憫苦心所希錫智慧

贈王給事

君家臨大河龍門僅數武生長飛浮山耕牧安瘠
土西河溯遺風詠歌三百五小序乃國史得失於
焉取周南本根地厥惟夏陽古太姒窈窕宮人
所歌舞洋洋睢鳩篇房中以爲祖君詩兼風雅哀
樂有規矩后妃與琴瑟文王與鐘鼓文母壺墓存
再拜以依怙

邠陽詩大宗蘇武開其始西京十九篇爾則同芳
軌文質何相宣漢風此盡美君如清廟瑟唱嘆得
遺旨太音在朱絃神明所張弛五言變風雅樂府
亦驅使河壑氣所生子卿共鄉里元精得太素剛

厲嶽靈似神胡一鼎屬洪流爲披靡手盪龍門開
二山忽分峙太峯以四方削成苦如砥君從白帝
求混茫得斯理

讀書芝陽山子長祠在側土高風淳樸大文以爲
則灝氣接周秦舍弘復金德治水臨沱潛七年蠲
寢食憂旱索鬼神五行哀失職奉圭祀孔虔孳孳
以稼穡漢江與爭命蛟龍戢其翼身爲淇園樾決
口於焉塞上帝憫精誠胼胝爲溝洫微官免爲魚
成功告禹稷平生河渠書至此得盡力

治行以循良勵爲天下最徵拜居黃門直言無內
外奉使日南來咨詢惟利害執轡當市門殷勤駐

旌旆求賢得彼姝
片言若龜貝下閭
何溫恭小心
事耆艾好學以無倦
所書溢盤帶富有非
文章日
新乃光大持節還承
明喉舌帝所賴
北斗一斟酌
元氣以滂沛

梅花村作

路從賣酒田乃至
梅花村羅浮梅
大宗太古多遺
根紛紛諸巖谷
紅白皆子孫
蔽虧玉女峰含吐
扶桑曦依依綠毛
鳥朝夕相寒暄
自名曰么鳳啾嘈
似有言團團以相
抱首尾無一存
倒掛以自娛雌
雄情何敦氤氲兩
翅間一一梅花魂

登羅浮絕頂奉同蔣王二大夫作

蔣少參莘田王給諫

滌滌太古雲至今未開闢山氣日洶湧隨風灑精
液觸石生洪波微茫在咫尺登山若浮海舟航卽
輕策浮山復浮去與羅萬里隔僅餘玉女峰娟娟
在肘腋蓬萊無根蒂左股長爲客鐵橋苦拘繫峰
峰合體魄一氣膠漆之洞天在肝膈雷風吐翕時
氤氲相損益峩峩在虛無盪踏難留迹如何太舉
山乃爲巨靈擘便道通句曲大天有阡陌玉笥一
南竅日月暗相射朱明本火府艸木多純赤朱竹
含葳蕤紅翠美毛翮南禺亦丹穴鳳族以千百口
銜芙蓮花紛紛墮瑤席珠尾若楊麾往來拂巾舄

麻姑何秀峙散髮至腰脊上下飛峰間不肯相扶
掖筋力盡青冥漸與空天迫微軀若鴻毛順風思
一擲衫袖卽飈車不用浮丘伯神明自鼓舞鸞鶴
惟所擇便携二大夫八極恣揮斥神仙雖惝怳此
中有窟宅真道苦無言與天日相索聰明乃塵垢
陶鑄有微責雖復遊無窮亦自悲人役神山有離
合依依且朝夕鰲首或浮沉廣大日以積彌縫費
造化隨波恐流易分水一泉源自天通地脈瀑布
縱橫飛與海相潮汐天雞一咿喔扶桑已半白海
日長三丈玄黃始一隙光明未麗天外體已赫赫
搖蕩二石樓燒空如琥珀生長暘谷傍鬱儀日親

炙中夜已寅賓導引成肥碩咸池灼欲焦滄涼吾
自適一下曜真臺人間愁踈踏百慮生黃埃世務
嬰繁劇三山居水下船交苦風逆齋去童男女三
千良可惜羅浮卽方丈甘心自古昔南嶽一佐命
仙卿此註籍大夫代天工於此宜區畫雖無封禪
書名山望潤澤

枯上蘭

在全州赤蘭舖中

蘭生乃無土托根高枯端爲君作蘿薦青青同歲
寒馨香在天半無因充玉盤嗟爾寡芳人盼望空
長歎紫莖何嫋嫋綠葉何反反但見白雲覆安知
清露溥嗟彼生沅湘枝枝臨江干行人得采擷持

以成幽歡一朝蕙艸晚棄捐同齊紈雖蒙置箱篋
詎異塗泥間

菩提壇

大鑒禪師
祝髮處

菩提有靈樹植自蕭梁前智藥所移根航海來炎
天歲久榦中空蒼皮相糾纏根鬚自生千百垂
連卷大者成虬螭小者藤蘿穿結束成一身四體
何拘攣下枝多洞穴崩陷至三泉上枝雖臃腫亦
自方且圓雷霆日大索鱗爪無畱姦神火所焦灼
千尋亦童顛二月葉始隕槎枒餘一拳葉狀如柔
桑五月爭新妍僧伽漚成紗弱薄如翅蟬持以遺
遠方恍惚鮫綃烟南中多恠木巨者惟木棉柯作

女珊瑚丹葩燒天邊開時無一葉一一烽火焚光
如十日出吞吐海東偏么鳳巢蕊中血染綠毛鮮
復有細葉榕交陰連陌阡根鬚亦倒生合抱爲一
椽縱橫作廣廈戶牖相盤旋腹大容十牛亦可藏
舟船皮膚左右紐癭瘤以萬千士女所婆婆伏臘
拜必虔菩提更神恠與之難比肩大上昔灌溉甘
露流涓涓左與訶子接右與蘋婆連蒲葵居門外
其壽亦彭錢下滋達磨井上蒙虞翻園肥沃多火
膏鹹氣不能宣菩提所覆被細艸皆芊綿累石作
香臺蟲蟻愁攀援談經者誰子袈裟羅東西空中
雨四花大半爲青蓮琉璃作喉舌宗派開南禪遺

壇久寂寞鐘鼓徒喧闐大夫京國來車騎何連翩
求古得招提實爲越王宮牛羊所躑躅霸氣成埃
塵楚冢旣蕪沒侘城亦已平番禺作雙闕藥洲犁
爲田英雄乃椎結竊據亦其賢身爲裸國王興亡
誠足憐不才嘆喬木汝乃全天年不蒙匠石顧鬼
物司其權人生有太和日月苦相煎本根不自固
輪囷安得存文梓化青牛老楓成羽人精氣非我
有與物相推遷願言保萌蘖三復牛山篇

五仙觀

有五
羊石

神靈所窟宅厥惟祝融鄉浮丘與安期來往亦不
常何者五仙人各騎一色羊手持五穀穗芄芃三

尺強黍稷居兩旁粳稻居中央羊亦銜果蓏以種
遺炎方豐年再三祝倏滅餘景光越人念粒我春
秋修蒸嘗報養若先農水旱仍遑遑作觀楚庭西
五仙列成行少者及當中老者左右方膝前各一
石或蹲或翱翔或立或僵臥大小相低昂抵觸勢
有餘角形彎以長言是羊所變毛質皆青蒼一卷
自周時摩挲歷帝王斑駁兒手澤表裏含光芒
番厓多膜拜薰用蘇合芳餘竅出烟氣一縷何飛颺
恍若白雲核氤氲所含藏尺寸天所畱所關乃雨
暘吁嗟爾君子言觀來芝房南交多瑰貨不以充
資裝依依此恠石三嘆空傍徨

送張超然返虞山

去年春上已送子珠江南願子寄我舟上無檣與
帆今年小寒食送子珠江北願子萬里身上有雙
飛翼三歲別妻孥夢中見顏色吳下一春人鴛鴦
苦無力嬌女未扶牀呱呱在錦臆游札有遺風伯
鸞所朝夕昔家梧宮傍今移拂水側言公昔浣衣
有石方且直夫在石東耕婦在石西織節節皆爲
雙白紵充衣食裁成一明月皎潔終何極

子游有浣衣石在虞山下

行藥城東作

仲春已清和逍遙可行藥炎洲多靈艸勾萌先咀

嚼采蘭者誰子邂逅當林薄無營似白華無欲同
朱萼綠葉與紫莖平生所磨錯微雨土膏滋本根
遠相索其旁石菖蒲尺寸瓊瑤削紫茸何葳蕤九
節含風弱安期所服餌玉顏以灼灼秦帝於我求
蓬萊奮雲蹻千歲與君期神仙多戲謔橋下流辭
鋒少君與斟酌安期生常與李少君采菖蒲酌辭鋒水於廣州城東

古詩爲王將軍壽

將軍學淵府日與諸儒遊縱橫飛文雅藻思紛雲
浮大帳開朝臺道德爲戈矛清辭若飛兔超山越
海陬伊予乃駑駘龍驥不可求首夏氣清和衣袷
臨河洲酒稱千金壽主賓交獻酬十丈攀枝花朶

大如觥觥注酒鬚辮中百壺爭川流玉女笑如電
紅口不能收壺矢一再行雅歌相綢繆願君似山
丹顏渥無春秋歲歲珊瑚林持以爲觴籌

不草詔

武宗皇帝欲自稱威武大將軍而以江彬副召
大學士梁儲草制儲奏曰臣草制是臣名君臣
不敢草上手劍睨曰不草齒此儲免冠伏地
請死上乃擲劍

如何聖天子乃稱大將軍當制不敢草嫌以臣名
君皇帝拔劍起不草卽誅爾免冠伏殿前淚流請
就死剛哉古大臣不辱朝廷體

詠高士王賓

王賓字仲光吳郡人志不願仕永樂初白壤其
面人多以爲狂嘗賣藥市中所至羣兒隨之賓
與嬉戲歡如也太守姚善造門踰牆避去善却
騎從獨候之始與相接據坐受拜若師弟子姚
廣孝旣貴請見弗得方盥掩面而走

至人能嬰兒嬉戲存天真長爲渾沌宗棄智如埃
塵直木必先伐甘泉必先涇於世吾何求聊爲葛
天民朝饑采采柏暮寒棲草茵抗節終不回湯武
非吾君毀我白玉顏裂我華陽巾遙遙狂接輿相
攜共沉淪

訶林詠古

蕭森訶子林蒲葵鬱相向榕樹與菩提枝枝似交
讓歲久根爲榦倒生多怪狀植自蕭梁年半槁神
廟王下有談經壇精靈此倘悅曇摩昔盥鉢泉湧
何漭漭海眼雖潛通洋溢非潮漲三酌有餘甘欲
持作春釀南漢跡未湮有無在滄溟塔影搖清漪
魚戲玉毫上光流若玄珠盈手可相覲佛氏多寓
言翻譯勞文匠妙道貴神會無心卽罔象

老穀樹爲大風所摧詩以傷之

穀樹大數圍植時不知歲精多作膠液注流至根
柢斷以團丹砂玄黃何泥泥或爲金石漆脂膏苦
白斃蟲蟻所瘡痂百千以膚噬臃腫旣空心拳曲
亦流涕霜皮剝辱餘雖存若蜩蛻竅穴一穿漏枿
圈無巨細腹中若蠡房蛇鼠相啓閉一二鼻口者
火入煙蒙翳疾雷屢震驚花葉多焦脆颺颺昨練
風四方忽排擠怒呬一晝夜柯條尚牛掣雨師復
培擊參天俄失勢朽蠹已有年婆婆終一蹶摧折
當腰呂尋尺若刀剗崩壓西鄰牆斧斤勞僕隸大
枝劈不開小枝競先曳憑依懼有神酒食陳微祭

喪我高樓陰炎曦無可蔽嘲啾絕燕雀纏糺失蘿
荔生身本惡木美名蒙詬厲散材一何幸與檀作
兄弟託身在丘園有稗思爲礪斑穀持作冠楮桑
持作幣所用雖皮膚於人已有濟亦未苦其生楂
梨共狼戾本無勁挺姿枝節多疣贅蓄害始香甘
蠹動乘其敝狙猿杙亦安豈必高名麗受命有窮
時薪蒸不遑計培覆皆天年萌蘖庶自衛

閉甕菜

惠陽太守席上分賦

北人重御冬菜茹多旨蓄芥美在霜根下體甲諸
藪秋膾用多餘淪湯殺其酷薌料糝屢加茴香與
椒目實之大小罌卵鹽相滲漉封口水泥堅芬馨

甕中復一閉天地房氤氲歷涼燠出之佐齊豉辛
脆宜糜粥膏腴饜飫時爽口憑一劑薄切蝸翼微
三朝無白醖下酒廢烝雞燒雉及脍脯浙東糟笋
苞吳閬醢來脰蒿苳稱秣陵黃芽說安肅豈如斯
味嘉嗜之非口腹性溫奪七菜寧惟勝榆肉茶苦
既不同薺甘亦非族使君撤俎時以茲雪公餽馬
馱自寶坻羸餅苦不速故鄉風味存和調自家督
北人喜芳辣薑桂日餐服牲用煎菜萸濡魚多寶
蓼貴以辟天寒口體非相逐化食通五中爲菹及
金伏歲暮百艸萎市無生菜鬻醃者先溫菘藏者
及襲奠地炕蘊火多鬱養催瓜菽冬生物性違非

時嗟彊孰在芥雖易生秋收忌霜觸富家千甌
於芥靡贏縮貧亦拾滯遺寒爭一日暴寧如我嶺
南臘月嘉蔬足三蒿與二藍紛葩滋五沃蒼蓬蔽
田塍波淩彌水渙一稞三兩錢畦畦雜種稌葉青
連露葵藟黃若時鞠冰雪昧平生微雨時膏沐人
家菜脯稀鮮食乘芳郁蘋芋如丘山爲飯代粳粟
豕飼餘蕪菁馬銜兼苜蓿芥臺四尺強芼羹亦碌
碌莖股九蒸晒間用吳風俗野人方灌園荷鋤先
僮僕三餐厭蔥韭七箸慙華屋從君乞此方今冬
作數斛南中水土殊滋味恐未淑須君歲見貽銀
魚及醢淥

君家寶地所產多
銀魚歲以餉客

後割肉詩爲汪孝婦作

有序

汪孝婦者姓吳氏歙人歸汪嵩如歲甲寅寇躪
徽州嵩如時客他縣其父履生遘病方逃竄山
谷無從得醫吳憂恐不知所爲夜倉皇割左臂
肉和血濡縷雜羹湯以進浹日而愈吳處士嘉
紀爲作割肉詩有曰兒行遠服賈家中父危篤
門外十萬賊殺人滿巖谷父病乃膈食兼旬絕
五穀搶攘救者誰新婦起躑躅仰告頭上天俛
視臂上肉肉隨利刃下自糜作羹湯忍痛金鬻
際天角東南明上堂先進湯須臾再進羹羹湯
甫霑唇翁曰胸懷闊不知病何往從此復啖啜

果餌恣所歡美炙無絲設鄰人上墻問行路爭
傳說賊衆得聞之傳令整行列毋驚孝婦里兵
馬去蹙蹙寇旣平嵩如行賈揚州吳獨居織作
泝泝紉如故時緘書重相警勉無何嵩如訃聞
吳絕粒食不欲生旋以堂上舅姑及兩孤爲慮
強就食飲櫬歸自擎一器匍匐伏迎奠則羹右臂
肉也蓋自傷不能以活其翁者活其夫云辛未
吳年五十子天與天長乞海內詞人稱詩以壽
欲得吳處士其人者爲之先倡不佞大均與吳
處士交好處士泰州人字野人高節能文人以
其言爲重大均向讀處士割肉詩異之以孝婦

古之賢媛也壬申秋八月吳小叔于鼎文治以
孝婦事自刊江郵至始知孝婦爲于鼎文治之
嫂于鼎文治亦吾友也乞予詩爲壽予雖不文
豈可以不繼響野人而更表揚之於是以野人
所作爲前割肉詩而大均爲後割肉詩其辭曰
新婦前割肉割肉爲翁痛翁苦膈食久腹中粒米
無門前寇十萬殺人肝腦塗無從乞鍼藥鬼伯方
嗚嗚救死何所有所有惟肌膚翁命繫新婦氣絕
只須曳抽刀向左臂雖羸猶膏腴一臠大踰寸重
可二十銖非方亦非圓珪璧良不殊血裏若絳雪
猩猩紅不如聶切作和羹翁食能無餘胸膈忽盪

開病瘳不待晡賊衆聞却走毋犯孝婦閭鄰里競
來視各請翁所需饋食悉精美饜飫翁不懼夫時
在邗溝親友皆來趨夫名以婦知稱婦因稱夫不
知夫視婦芬芳長與俱無何先朝露夫溘歸黃壚
訃聞不欲生欲殉憂諸呱呱尚可棄堂上有舅
姑舅姑豈盤石身衰同秋蒲匍匐靈櫬前奠饌無
蒸雞抽刀再割肉右臂白如瓠左臂創未平刀口
成癰疽療翁未死前割肉猶不辜夫旣已奄逝割
肉何所圖肉豈驚精丸刀圭魂昭蘇三日苟不生
神卽幽艷都割之等泥土祇自戕羅敷念已活君
舅天理庶不誣爲夫惜一嚮恩義何次且報生復

報死所捐非全軀腥臊不足食差勝充庖廚皇天
令不死五十猶勤劬二男已成立干祿知讀書母
肉尚餘幾一身半苑枯在母如鴻毛寧知慘自屠
在舅如泰山返魂因彼姝在夫卽牲牲肥腯踰羊
酥吁嗟夫在外不得親口珠尊章與藁砧骨肉何
親疎九泉歆此羹味淡同瓜蒞十年不同食所嗜
忘其初忍死更幾時同穴寧踟躕爲壽詎忍言兒
女徒歡娛未亾至百歲蜉蝣歸其居

王母金孺人壽篇

阿母年稚時療親能割股肌膚不敢愛欲以報依
怙北宮撤環瑱不嫁亦何補旣歸事威姑殷勤持

潼乳爲姑食小郎鞠育無寧處婦也母其姑身猶
膝下女朝夕慈旨甘力作爲脩脯爲舅償積逋十
指累銖黍夫亦用計然爭時務廢著糞土貴出之
珠玉以賤取既富行其德樂爲仁義主公子法雍
容游閒孔氏伍得利愈纖嗇歸富乃廉賈暮齒返
鄉閭骨肉歡相聚有子二三人多才學淵府歲朝
陳椒觴上壽歌且舞偕老始六旬孺子色猶嫵白
頭喜戴勝垂髮至腰呂堂前大小婦髻高學天姥
百福開春奩千華獻瑤宮爲母稱無疆與公享天
祐

送王立安還寶坻

朝辭羅浮東暮指田盤北代父觀察公還家敦子
職太公七十餘未杖多筋力好學日神智康強以
不息天生難老姿况復善飲食膾兔春宜葱羹魚
香用稷自釀渠陽春益滋玉顏艷元氣日斟酌用
精解纖嗇耆造多子孫一一皆岐嶷大小諸童蒙
納婦家能克觀察政大成悅親道已得迎養苦路
長炎荒在蠻域茲焉復川南蜀道勞攀陟尊老不
遑將靡盬情鬱抑所喜太公年春秋尚千億眉壽
天所私於以報平直君今去奉養慈孫人盡識文
章爲旨甘仁愛乃容色神明出不窮古人漸相逼
吐納風與騷以爲大雅則子道在白華絃歌貴朝

夕無欲爾處子堂堂作矜式脂車明啓行踰嶺方
崩旁間關豈不苦庶以蕩胸臆山川洞經緯利害
知興塞情僞若觀火庶幾免回惑風尚還淳龐人
心去邪慝持此經術功自可一道德行矣趨祖君
于彼無終國候鴈春方歸翩翩同矯翼上堂奉几
杖嬉然隨釣弋餘閒向南丘或亦觀稼穡引領當
夔門僕夫正匍匐嶽崎棧閣傾詰屈車輪仄蠶叢
九折中而翁馭方叱江行復灘嶮叢石爭雄特千
盤出崩厓百丈牽生笏巫雲撒白鹽三峽俄昏黑
舟與淫預鬪象馬勢不測入城尚無人猿狖疑蒼
赤豺虎方咆哮甘人作口實況渡瀘水西壤已鄰

滇焚烏蒙與鎮雄翹首神君亟撫綏亮有方威愛
知無忒艱難移孝時庭闈不敢卽萬里致忠勤何
殊在親側往覲君母然垂堂且自敕居行各有經
至性本天植純孝質有餘不受丹青飾矧君邇京
華會當馳玉勒謁考得秘書鳳池簪筆入曰惟大
父慶此事亦孔棘帆開珠海湄沙喧起鵲鵲送送
無尊酒何以慰相憶澤陂有芙荷中心含苦薏美
人碩且懸寤寐終何極

題桃畫

父年九十二松翠多霜姿女年七十一萱榮含丹
暉父乃爲女壽濡筆何淋漓畫出綏山桃紅灼如

花時歲荄帶綠葉碩大垂青枝五桃象五孫大小
光離離王母此奇果玉盤盛參差昔與漢武帝食
之享期頤父今亦方朔持以與女兒女爲人尊母
福履無窮期康健富筋力玉杖尚未持行年已大
耄厥翁方秀眉作使萼綠女奉觴亦不遲閨庭日
爲樂和氣何雍熙嘉慶留此圖令人生孝慈

贈佟聲遠

長君四十年汝乃謂予兄豈非以才故雖少可鴈
行我愧老無聞蹉跎徒杖鄉於道苦不足豈敢矜
文章殷勤辱招致何以酬謙光暇日開園林相與
浮羽觴袒跣攀芙荷禮法亦已忘亭似華絳趺注

立池中央又如千葉間特出爲蓮房君多令兄弟
韡如唐棣芳華萼相承覆親愛多嘉祥伯兮宰大
邑治行稱循良叔季皆大器磨礪成珪璋與父觀
察公接踵登廟廊君今未欲仕散帶聊清狂黃金
得貴顯是道奚足臧才如漢司馬嗟彼乃貲郎時
時幸稱病不逐諸公卿得與文君歡飲酒清琴旁
君今美辭賦知己多鴛鴦毋令綠衣人侵彼丹鳳
凰君子哀窈窕不淫師文王如彼王睢鳥和鳴當
春陽

臨危詩

丙子歲之朝占壽於古喆乃得邵堯夫其年六十

七我今適同之命也數以畢所恨成仁書未曾終
撰述嗚呼忠義公精神同泯沔後來作傳者列我
遺民一生歿累友人川南自周恤獨漉題銘旌志
節表而出華趺存後人始終定無失林屋營髮塚
俾近冲虛側